

晚
晴
移
詩
匯

晚晴彞詩匯卷五十一目錄

吳銘道 二十五首

周龍藻 十九首

吳雯炯 六首

吳焯 五首

華岳 十二首

孫琮 十三首

杜乘 六首

羅牧 三首

劉瞻榕 三首

蔣平階 二首

范纘 四首

許尙質 三首

邊維祺 三首

沈湛 一首

倪蛻 三首

馬鳳翥 七首

馬景 一首

馬霽 二首

馬庶 二首

晚晴移詩匯卷五十一

徐世昌

吳銘道字復古貴池人有復古詩集

潘稼堂曰復古示余滇海詩山川形勝摹寫如繪才識志趣卓犖不羣毅然以古爲師絕去近代卑靡纖巧之習可謂能自樹立者也

詩話復古爲樓山之孫布衣終老游迹半天下滇海集最多最勝幽奇矯變稱其山水布帆集憑弔故都感懷遺舊豪宕激楚多可傳之作嘉禾汪方岳竣贈向云吟到南朝事哀音不忍聽又云攢眉心自苦睇髮志原高頗足見其生平

雁峯山上酒送子去江東彭禹峯先生朱陵送別家

君子詩也直上五丈以其韻見贈奉答

往事真如夢心傷大小東青煙埋戰馬冷土蝕遺弓複壁
猶藏趙冰天莫薦洪年年明月裏烏子咽吳宮

罵坐非因酒無須怨魏其何來甫也賤獨就挺之兒別憶
朱陵後人今白髮垂通家重先世泣涕雁峯詩

寄兄弟

督亢陂前秋復春埋荒落日憫勞薪州存十六興亡蹟路
絕三千南北津急難弟兄鐙火共傷神妻子涕痕新觸懷
夜雨歸何自莫澣京華一簞塵

故山老圃近如何行菜分瓜夢屢過烏柏攢紅雲腳補稻
孫抽綠水痕拖趨庭遙慰承歡好作客難禁寫恨多無復
市中屠狗輩容誰筑倚漸離歌

滎澤渡河

廣武山前日欲暮浩浩黃流絕天注踐土沙埋積血腥戰
場弔古盤荒戍陰火青燐夜近人飢寫竄鼠嗥當路浪打

孤城移上山礪礪已解成皋固燈前殘壘漢與楚百戰重
瞳此中誤

劉景升墓

東朝黨錮竟流離俊及名高亦可思莫向呼鷹臺上望人
間何限景升兒

關索嶺

關嶺插雲星躔微渣呀斗絕排天扉鷓鴣含愁蛇倒退猿
猴失勢鴉難飛千盤萬疊寒煙霧毛寒骨悚臨危鞮羅鬼
花苗鐵脛挺披蓑頂笠如突豨山腰大竹立萬戟飛泉殿
礎寒侵衣云昔武鄉關荒服綸巾羽扇窮鉤鏃是時將種
了英發關刀大馬從指揮擒縱功成百蠻泣稽顙羅拜賓
天威至今嶺上勤伏臘猺舞盤珊鹿豕肥銅鼓隆隆震哀

壑香煙鬱若含涖微往事如塵風樹吼荒哉誰與論是非
巉巖祠宇表天末西南萬里罔敢違雖無其人亦不朽用
懾殊種防突圍雄爽奕奕懍若睹乃公是千古所希壁壘
巍峩山鬼嘯天陰日黯瞻靈旂

至滇池

六詔關河萬里程漢家池水古昆明段興花繞金陵澗莊
躡山開玉女城枸醬蠻王經百戰海簞漁父話三生月前
雨後東西寺出水孤光一道橫

絕憐生望玉門關閉斷羈臣老未還雞馬祭遙供鬼食西
南檄到破神姦山堆秋爽鴉頭髻水作江澄雉子斑細說
披猖邛笮事殘兵久不事黃間

游安甯溫泉

野性頗愛山逢山便欲住那知此山中幽勝復無數桃花
豔春津鱗鱗踏前路沈綠注芳池悠揚滋暝露本非無垢
人幸可洗塵霧石壁奔雲泉聆風儼韶濩亭花映人肉狂
吟欲仙去靈竅覆一鐘貪看忘故步穠纖半簾日流光不
肯駐世俗未能遺沈吟返三顧

天橋

點蒼之衝洱海洩處有石梁
曰天橋望之股慄人不敢過

天工如巧匠洞山斲山骨要使海可穿漏此月中窟勢若
猿臂伸矯甚龍角突安知鴻濛前一一斧斤伐山靈偶出
音引流透一髮下視誰當捫震掉鬱咆勃

渡蘭津

博南開道行人悲怒流崩激驕馮夷兩崖萬仞掩天扇中
流一綫穿坤維鐵錫天浮作飛渡飄飄懸檻搖風威青猿

接臂擲巖石孔雀將雛飲江湄黃茅瘴壓纖霧冷玉條煙
合蒼林迷丞相祠堂峙絕壁風濤磨蕩相蔽虧蠻王斂手
受約束官其渠帥羈縻之銅柱遙連孟優墓金齒未塌呂
凱碑茲橋奇隘世未有挾而超者人其誰天爲邊陲作門
戶留此罅處神所司縹緲空騰數百步目眩那敢低頭窺
發源西極崑崙足破山直注南海涯瀾滄萬古急於箭華
陽黑水聯三危

點蒼山

點蒼蒼峯十九點截破青天透天表雄踞稱尊九州外眼
底猶窺西海小空中仙人作玉戲水官騎龍銀色皎豈無
雲篆守蛟螭望絕瓊樓架縹緲意態譎詭無一同萬幅丹
青寫奇巧上有天河向下垂常見雲中騰怒爪腳插葉榆

數百里鱗甲如生誇珥抱點蒼之神夢謂我子來看山何
草草茲山幾閱世變更獨據西南轄蠻獠漢家中郎漫持
檄破碎滇雲竊文藻遂令名字露中朝金馬碧雞來祀禱
蜀中丞相亦多事要市天威奮天討南人自此不用戰荒
彝那復知天寶鮮于李宓妄用兵二十萬人如電掃尙說
豐碑紀鄭回豈有殘詩尋賈島從茲爰道生荆棘玉斧畫
疆別城堡蒙段居然遞自尊六詔煙霾難記考往往人來
弔踪跡山自青蒼人易老只餘古雪照天邊冷魄何堪爭
窈窕誰從五嶽問真形坐使遐荒狎猿鳥我方讒語笑山
靈世事無端分白阜中原戰場百千萬蓬蒿滿地迷昏曉
碌碌人間澆不盡雲夢胸中吞未了何如醉卧醒酒石槽
騰不用滋紛擾

洱海

罷父之山洱水源首尾峽束中淵渾劃地橫開大理國挾
風釀雪天陰昏波光渺渺破古鏡寒濤日蓄蒼山根特留
隙地闢城郭一覽已盡百里寬四洲三島在何所稍見數
點青鴉翻長路漫漫繞海角孤煙一抹銷人魂朝看帆來
暮帆去風如潮信無移痕五湖欲往計未果思與水仙相
對論

大慈寺飯

潛流略約塞枯查一徑寒空遠更斜樹底泉聲松子路煙
中人語梵王家因過竹院思留偈未到鐘時呼煮茶細雨
霏微山下去萬針衣冑刺桐花

四月十五夜見點蒼山雲綿互如練與月色相麗數

十里不斷光景奇絕

好山旣殊絕復此山月升月高已到地舉頭見峻嶒白雲
展素練如雪還如繪其氣欲礙月究竟力不勝謂山得靜
體清淨無摧崩謂雲了無物生滅時相仍可滅自不滅靜
者動所憑相忘更相待璧月懸宵燈夜定萬竅寂所見得
未曾欲發廣長舌妙理吾何能

淨慈寺

先大父樓山公有淨慈寺詩一首是前癸未
寓湖上作入寺低徊猶可默憶迺追步原韻

存之湖
上焉

寺門見南山入寺復了了愛此塵外棲可息塵中擾煙雲
護鐘磬何以答窈窕幽谷泉味殊接筒香積繞落葉不到
地風吹過林杪前峯卧夕陽西望若初曉茲境故清絕人
猶存見少蒼巖竦高處倚檻放遠眺湖光近拍檐霜冷尙

瀟灑低徊不能去吾將逃物表

游峴山

前年渡漢水已墮峴山淚今年登晤臺獨倚窪樽醉復此
吳興游忽動楚澤思自從有此山游飲誰不至遐哉賢達
流望古僅一二抱此山水衷慷慨發長喟嗜好旣殊俗悲
傷匪無意遙遙千載人唾地到吾輩嶺雲頗欲雪野梅疏
更細淥水碧搖天磐陀小可憩當爲十日謀有酒身無事

潘稼堂先生見留草堂

耆舊已遼落牀前拜德公人餘柱下史身是魯靈宮杞宋
文何在齊梁運易終吾猶及型典信見剖鴻濛

蠟屐無論兩杖頭甯計錢游經岳有五筆斷載逾千細數
東林事潛傷南渡年尋常言笑處忍淚不教傳

二十八年別公高在急流吾翁占損益晚歲倦遨遊復此
故人子來同今雨秋松風溪上宅話舊且淹留

贈復官

勿齋徐宮詹曾孫其祖爲昭法先生於豫堂太史家相見感慨泣涕而有此詩復官其小

字

繞樹棲難穩驚巢甫脫身可憐三戶楚都作兩朝人賣卜
門生在遷居孟母鄰要離今日冢欲往辦香陳

太湖舟中望洞庭諸山

今朝震澤行動盪玻璃色四萬八千頃浮天杳無極東西
洞庭山縹窈如潑墨與我相周旋招之不可卽舟里那復
返毛公久滅迹可憐水犀甲石蘊化深碧更聞此山中幽
人無歲歷老死不出山何由識兵革回頭笑句踐藉手婦
人力一朝良弓藏解使大夫惑去去不足道此水可亡國

登北固山

北固江山圍鐵甕波濤浩浩兼天送金焦門戶兩浮杯
閱世如流真一夢很石之名亦已矣紫髯桑蓋談微中
北人乘馬南人舟祇說風帆絕飛鞚一朝鼓角地底鳴
舟似老牛鞭不動岸上奔呼殺聲惡棄仗連營噀重煙
中尙見梅花嶺血色模糊指螭螭雄鎮原無韓岳功
廷諍誰來陵黯黯徒然猛點非長城豈能別駕借雛鳳
江山相對各悲愴風景淒其失豪縱海潮歲歲齧山根
木柿竹頭填石縫東來流涕竟何人飲竭黃壚嫌未痛
卧龍已去獬兒亡縱有狂謀知不用浪淘日落無餘觀
空教事往留深慟

東花園感舊

菜圃初生野菜花東家門徑誤西家棲殘老樹嗁鴉苦
知

是新鴉是舊鴉

周龍藻字漢荀號恆軒吳江人貢生有恆軒詩集

潘稼堂曰漢荀為忠毅公曾孫高才實學目前無兩
夙長於詩才力豪健風骨蒼老讀其樂府百篇及詠
史感懷數十首識高意遠藏深蓄厚所欲言者積
多不能自制吐而為詩故能閎中肆外如此也
詩話漢荀為諸生時受湯潛庵宋漫堂兩公之知
堂延課其子盡讀稷堂之書其詩根抵深厚才雄
氣道稷堂極賞之酬贈長句有云君才堂堂萬敵
繩聲蝟竅不足奴枉遺佳篇見推許塗澤魚目當
珠兼愁史書無定本家鈔野篋人殊謂余粗曉著
書體及時撰此真良圖此野篋人殊謂余粗曉著
不敢虛蓬山奮筆豈無意其奈時命相齟齬家居
如人老益驕君之筆力可扛鼎留心典故班如願
共討論史義例貴挈綱領刪蕪蓋稷堂去官後猶
有志修正史稟欲引漢荀為助也歸思惟見其樂
三卷全集猶未出故別裁集僅取三首遺珠多矣

大牆上蒿行

牆上蒿自誇託根高根高苦不固萎落隨風飄牆上蒿自

喜擢秀早秀早苦不長離披抱霜槁蒿生蒿死曾足計但
恨踞盤難得地明堂選柱少成材等閒齊把蕭蘩棄伏波
慕良臣肯逐井蛙住亞父好奇策終被重瞳誤丈夫未遇
魚水知且辦隆中高臥處眼前富貴輕秋毫搏扶豈必假
羽毛紛紛依傍何其勞君不見牆上蒿

後怨歌行

藕絲斷不再連銅鏡破不再圓卽看金屋人如舊昨日恩
情今日捐情多情少安足計只道色衰恩始替驚心最是
落花風偏在溫存旖旎中妾恨不爲珠娘樓窈娘并骨碎
君前猶耿耿求凰曲化白頭吟撥盡紅鑪灰已冷當初離
鄉來滿望登玉階玉階非不登轉瞬沈草萊乃知苦樂眞
相倚纔隔衾裯同萬里升沈反覆變須臾縱有容華難久

侍

經東湖公戰地

昔年曾此結連營萬疊湖波怒未平
螳臂自難當轍奮鵠魂應向繞枝鳴
楚人浪說憐三戶夏肄傳聞少一成
今日經過重太息西臺餘淚倍縱橫

睢陽湯公輓詞

初喜明良合旋傷道命孤世應摧直道天亦喪醇儒正色
居朝著昌言備廟謨常羞持祿位未擬保身軀仗馬方箝
結成烏自畢逋羣嗔楊震驚翻笑馬光迂白日高難照青
蠅點欲污尸猶思指佞瞑豈爲憐吳定論中朝在遺哀南
國殊銜恩徧倪耄會哭盡生徒峴首碑宜勒桐鄉祀不誣
瓣香曾願託北望淚蘇蘇

讀漢史

供帳都門羨二疏
賜歸猶得老田廬
他年蕭傅催和藥
一著先機恨不如

和柳塘先生燕詩奉寄京師

秋社年來事總非
自將弱羽託烏衣
看他華屋羞輕入
留得孤巢擬獨歸
鷹隼猜深應遠害
炎涼歷盡早知幾
當風莫笑身無力
未肯銜泥附熱飛

歸太僕墓

震川有遺冢
零落鹿城隅
一望荒原迴
數行老樹枯
瓣香文字在
孟麥子孫孤
無限沈吟意
殘碑孰遣扶

賜租行

康熙二十三年冬
翠華拂天來
江東時巡鉅典廢已久
郡

國始識虞周風聖明御宇憂赤子疾苦歷歷徹九重豈惟
頓遞罷騷繹耕斂在目常忡忡三吳一隅傍湖海水潦間
歲驚堯降塗泥厥土賦下上其後百倍於域中哀此澤國
凋疲地征求旁午煩大農上供強半竭腦髓督責返調財
賦充是時持節有湯父入告實與皇心同度支經費關軍
國不得驟免租調庸丁卯建丑月初吉恩綸浩蕩頒紫宮
科徭纍纍許現放白骨起肉流膏洪歡聲如雷喜氣徧吾
皇猶欲哀其窮常聞五載乃一狩盛世盛事忽兩逢鑾輿
初入淮南境葑屋早已迴宸聰非常之澤古難再至今獨
歎吳民蒙舊逋新欠悉滌洗覆冒直比天穹崇尙憾湯父
死未覩喜極下淚雙眼紅賤臣手捧黃紙詔有口願祝齊
華封矢詩豈敢備國雅謳歌田野隨兒童

逐鸚鵡詩

丹穴有靈鳳生爲百禽王苞采備五色和鳴應時康豈期
鸚鵡子潛身來南方雖具明慧性其才本非良逢迎恃巧
舌百變如笙簧一朝惑鳳聽翦拂置高岡既竊竹實食又
傍梧枝翔遂使燕雀輩聞聲互游揚公然鸚鵡驚前爪嘴誇
擅場肯顧不密危形勢日鳴張秋天下鵬鸚搏擊乘嚴霜
力逐鸚鵡去爲鳳立紀綱從此羽翼戢下上安厥常宋都
鶴早退魯門烏盡藏廓然六合清鳥鸞各分行來儀指虞
廷萬古頌德昌

孤鶴篇

孤鶴海上來其鳴聞九臯丹山佐威鳳逸翮何翛翛規翔
而矩步獨立長松梢豈期眾鳥羣側目多呶呶警露羨清

冥凌風如霜毛旣怨惠養重兼恐恩寵牢魚梁有鷓鴣厥
性最貪饕生憎鶴皎潔讒謗聲騰鴛鴦鴟鳩搏腐鼠大嚼自
謂豪一朝防鶴奪腹劍從傍操亦有鴉雀輩日爭枝上巢
妄擬鶴爲敵不憚引類撓禿鷄復覘覩垂涎乘軒朝百計
求逐鶴私盟鳩媒要鑠金積毀入坐使黑白淆身落籬籬
中失意逢漂搖非無秋天鶴急難昔咆哮視此忍不救雌
伏甘蒙嘲吾欲命杜宇爲鶴訴鬱陶但勸不如歸息影竄林坳
方高吾欲命杜宇爲鶴訴鬱陶但勸不如歸息影竄林坳
可憐孤鶴孤百事憑煎熬長頸不得伸憂思徒惛惛鳳穴
萬里遠舉吭將誰號

楞伽山詩

先王定秩祀赫赫祭義懸豈容淫昏鬼得以非族干世衰

道始喪恢詭滋神姦咄哉楞伽山蒙詬數百年罔巒非不
美有孽憑於巔其事俚且誕意出妖巫傳公然飾屋宇金
碧窮芳妍木偶雜男女佩玉而紆鬟部卒侍兩旁肖像青
紅填遂令無知輩瞽聾自欺謾石湖水清駛什五排畫船
性牢必脩潔簫鼓仍喧闐雖值風雨夕奔走懼少延婦人
尤噂喑語惡不忍宣心邪乘隙入夢寐生狂顛動云神所
致禱賽宜加虔妖巫旣得志吹聲益狺狺鼓舞數邑民真
如蠅慕羶每當婚禮成先期陳几筵鄉村真可笑立廟溪
谷邊高廣僅盈尺尊奉天帝天屈指百里中日費千金錢
豈惟膏脂竭風俗因之遷陰霾蔽白日沈痼無由痊自昔
守土吏往往多名賢遠巡憚摘發半爲禍福牽湯公中州
起絕學今伊川仗節撫吳下變俗以身先痛茲淫祀熾能

使民德愆上章羅罪狀正氣回兩間一朝綸綍降盡取投
深淵震雷忽破蟄荒穢快洗崩山靈亦生色草木增蔥芊
政成甫期月璽書徵何遄一老天不遺騎箕歸星躔我聞
公去後羣小復煽言望祭伺昏夜稍稍酒食駢死灰偶不
戒虐焰恐再然我願獻此詩片石山頭鐫庶幾百怪息公
德永不刊

金陵書事用犁眉公錢塘懷古韻

自昔龍蟠地前朝此建都上游浮七澤沃壤接三吳晉宋
羞殘局岐豐叶壯圖北巡基並鞏南顧勢非孤鼠賊凌關
輔妖氛徧海隅堯城先示變高寢漸憂燕當璧違公論迎
鑿壓武夫新亭剛對泣狎客已羣呼刷恥誰嘗膽銜忠欲
賜鏤處堂偷宴息懷鷓作歡娛馬指移魁柄蠅營占奧區

通侯競瓜步宰相樂秦湖故劍傾椒掖良家進錦襦春鐙
翻樂府花月擁瓊璣一載朝廷小千秋涕淚濡舉烽空擾
攘借筋漫含胡但倚江波湧甯知王氣殊中興旋失鹿末
造遂瞻烏偶爾尋雙闕淒然感九衢禍因門戶兆隙與禁
庭俱鄭袖房帷寵梁王國土腴本防煎釜豆終見委囊珠
鐘阜風塵改行宮歲月逾葛公原盡瘁漢祚適多虞莫抱
蘭成恨休談元首迂

曹元首有六代興亡論

燕磯迴棹處沽酒鱸江

鱸

調明祖孝陵

鬱鬱復蒼蒼園陵氣渺茫城迴江獨湧雲散殿空涼撥亂
功初震開基德倍昌斷蛇無劍化鑄鼎有弓藏隧道懸鐘
鼓明樓帶阜岡烏朝分早暮芝產辨陰陽象設規模壯祠

官禮數詳豈期休運厄忽使寇氛攘率土成猿鶴彌天縱
虎狼燕京旋改玉滄海遂栽桑門欲罨罨壞庭誰警欬揚
中璫頭總白遺戶業俱荒亭破拋宮瓦碑殘壓御牆樵餘
松栢禿燒後黍禾長尙喜龍回馭重聞騎捧香烝嘗修異
世胄嚮動今皇登拜儀嚴肅宣傳語煒煌共驚唐六典猶
重漢三章故國游仍到新亭感可忘衣冠原廟盡風雨茂
陵狂抔土何須惜家居苦自亡畫難追賈鄧史忍讀宣光
乍對銅駝泣還憑石馬傷蔣山形勝在落日半昏黃

有感示門人潘文虎

半世辛勤付汗青那堪劫火早沈冥生悲天水遺民錄死
恨元家野史亭直筆至今徵琬琰成書自古在家庭與君
午夜重論及隱隱虹光下六丁

再登燕子磯

楚尾吳頭萬象開，重扶短策立崔嵬。
江聲忽定潮將落水，氣如浮雨欲來起。
伏崗巒方湧浪，縱橫洲渚祗流杯。
囊中可有驚人作，喚起魚龍舞一回。

王文成廬山磨崖碑歌

彭蠡日夜聞濤聲，廬山一柱中霄擎。
昔賢磨崖紀功處，輝赫常覩風雲生。
威武巡游政本亂，如木欲朽百蠹萌。
逆藩桀黠伺神器，潛溝肘腋資逢迎。
無端衛卒革旋復，公卿坐視不敢爭。
叛書倉卒聞闕下，廟謨束手愁用兵。
陽明一老據贛右，鉤鉅每信機先精。
平生講學能善用，遇事權略真縱橫。
漁舟得脫神所護，誓集義旅吞鯢鯨。
搗巢謀定乘間入，狐鼠晝出城圯傾。
牽率還救膽已破，蟲臂浪擬當車撐。

太守燎鬚屹不動梳攢飄湊羈天驚樵舍一戰元惡縛東
南反氣從茲清軍回直凌絕頂立宴勞將士親題名字體
怪偉大於斗長與山骨同峭嶮滎陽太史遠游返篋藏拓
本浮光晶朝來出示心目悚遺烈猶歎流宗祊何哉媒蝸
肆眾口學術勳業紛譏評試思勤王檄初發中外疑忌蝸
蟾鳴安危呼吸待一決非公智勇何由平自古成功居不
易異論甯足關重輕好留讀書臺畔磊落一片石洗盡史
家誣謗大義千秋明

讀顧亭林先生遺書一百韻

經術治之本與世共隆替故明中葉餘詞林少根柢區區
雕蟲流敦槃奉渠帥得華而喪實有作徒瑣碎卮言互剽
裂繁文紛組織持以備世用千百無一二若非醇儒生何

由豁氛噎戕戕亭林公猶幸靈光歸幼負穎異姿萬卷一
覽識孳孳老不倦精力窮六藝惟漢有專門家法代相繼
抵排起後來厥學日蕪穢拾籀象數亡射覆春秋廢脫簡
及徒詩墨漏孰補綴儀禮束高閣更新驚掃地咄哉教化
涇公然用儒戲舉士習民風轉眼趨彫敝俯仰三百年墜
緒隻身寄平生富學涉妙在擇其粹儒先遺訓存煌煌又
安繫旨要胸中藏觸事具源委樸斲資丹腹垣墉待塗墍
片語切生民動求長久利列史廿一家俱傳以經義銓選
倡停年魁柄誘胥吏賦重用不簡公私力並悴人才荒游
談言行半敝凱營務耗虛名冊伍罕精銳蒼茫河渠書南
北迭奔潰人心首不平涇水安得治居嘗扼腕多籌畫寓
深意長短尺度明輕重權衡備斟酌今古間緩急期有濟

儻能挾之出太平其立致餘波討聲韻往往造超詣周忱
尙拘牽劉黃極乖刺沂泗三百篇理準先柯祭以此正唐
音悉珠聯玉比再變而至道閭奧信獨契詩文最矜重予
奪慎所自山斗指韓公辭詭諛墓費水火同救民洞澈天
人際上者扶名教下者伸清議物性析莠苗支派辨涇渭
每當治亂防反覆無畏避能於寸管端斗極迴元氣所爭
國命關豈供估畢計羽翼六藝傳歷歷聽鼓吹下邑有愚
夫章句素自愧一朝覩遺書箠鐙讀再四勦說與雷同頓
啟重重蔽寒芒五曜瞻堪掃眾星躔因言以論人益覺頑
懦礪自飛翟泉驚乾坤忽鼎沸草澤饒英雄一障惜未試
白日墮虞淵干戈遽內興時無伐荻人辜負報韓志釋甲
來兩京痛定餘殘淚愁絕孝陵圖感極昌平記荆凡孰亡

存回首迷濠泗矧平喪亂頻邪正嗟倒植頭角自支撐姦
豪反啤晚岸獄拜軒臺家國憂敢置飄零兕虎途轍跡方
迢遘東海望波濤西陲覽形勢世運苟可回未缺囊底智
歎息火井沈衰燄噓難熾自擬不其山禮堂寫文字志仁
死則已晚駕將安稅啼髮靈均游裾恥侯門曳獨於羈放
中不妄諮利弊殷勤胞與懷絕少優游歲妖讖迄龍蛇一
老天不遺結願漢儒林竟與閔川逝嗚呼撥亂艱數窮大
道閉那無扶搖風縱此垂天翅仲淹沒隋代貴與遘宋季
元經該且要通考詳且邃卽今日知編一經復一緯學易
在庸言無爲虛渺滯考傳在實事無爲傳鑿恣喪服補願
命襲吉可無詈樂章訂雅南誨淫可無累至於三禮修口
誦必躬肄民物徧整頓何謝廊廟器士歸鄉舉良官須久

任昇賦田九式平簡閱四郊萃導川各有宜同文別以類
經術快大行風俗振古配安知公緒言不遲身後慰吾孱
失學久與公生並世道路萬里長未獲函丈侍顧未一得
愚頗慕窮經貴昔賢統系垂私淑乃成例入室仗桓譚盡
發雲亭祕嵩華自云高著腳庶漸企身心肅齋祓典籍嚴
輿衛欲求稷穗登功定深耕穡誰謂駑駘庸晞驥終非驥
警欬几席傍恐懼一簣棄

劉文成公祠

自昔生名世經綸草昧長真人起魚服志士應鷹揚厄運
紛蒙古先聲振建康天心懸去就人事決興亡尙憶參戎
略方期靖寇攘爲言偏齟齬戮力竟披猖乍歎宜孫敗兼
悲察罕戕鯨鯢終自橫旄鉞屬誰張帷幄千年合風雲四

海將相韓原有別伐夏有何妨吳楚從容下燕秦次第匡
霸才開一劍帝業定三章末路滋讒間中心倍激昂草無
鐘室赤石有穀城黃功烈同三傑蒸嘗並六王續封仍帶
礪矢報盡厓岡故里山川迴荒祠樹木蒼麒麟思畫像牛
斗看光芒梁甫吟堪老陰符策最良區區圖讖託何足重
旂常

塞外哨鹿歌

北邊萬里開龍沙皇仁遠格同中華時巡歲歲多盛事首
重哨鹿雄奇誇曠原之產不一族麇麕麀麇麀麀本朝
行圍等行陣營伍那敢輕鷲譁惟茲四十有九部率服久
備國爪牙圍場初合奉宸算上下罔麓陳采且額勒蘇臺
起霄漢幔城嚴肅當正衙旁列戎幄各以次旌旗五色飛

麤筆人如立草馬如蟻一綫出沒常山蛇星光閃閃互摩
戛不辨刀戟戈矛又左縈右繞鹿齊出匝地驚躍紛於麻
箭聲忽作餓鴟叫蹶腳幾欲赤手拏須臾黃纛從中峙渥
洼天馬蚪五花麗龜達腋不虛發震疊始信威顏加風行
電掃踰晷刻賈勇肯待鼉鼓搥聞弦膽破半自仆亦有帶
劍號且呀窮搜務竭猛鷲力他他籍籍載滿車縱教衝突
望潛逸儲胥密布還邏遮湯網特許開一面獻功均獲帝
所嘉吾觀古來賦羽獵其旨大半譏淫奢動稱苑囿奪民
產從禽先爲勞費嗟豈知絕塞乃天設什佰雲夢千瑯琊
用供聖明秋獮樂順時殺伐非過差而況供役並屬國推
心置腹馴荒遐羽林縱聞豹尾擁輕裘但控騮與驂矢詩
堪續騶虞什皇哉內外今一家

吳雯炯字鏡秋歙縣人有筌山草堂詩

詩話鏡秋居南昌少與羅飯牛友又從吳園次學倚
聲有香草詞其詩清妙有韻如詠柳云臨風如有待
落日不勝秋吳城鎮云漁火忽成市人煙不近城蕪
城春望云轉眼繁華三月夢隔江零落六朝山皆漁
洋所謂
三昧者

秋夜鄱湖旅泊

水聲喧枕上有夢不相親披衣坐煙艇愴然傷心神客久
情自失天寒日易昏風濤高過屋蘆荻長於人漁火浦溆
暗榜歌答舟鄰去去彭蠡豬忽忽揚子津太息千里道飄
然一葉身

雪中送汪半亭歸西山

對酒不成醉江城雪正飛可堪時序晚又送故人歸世路
多荆棘文章老布衣西山棲隱處重葺舊松扉

東湖

芳洲一曲水冥冥攬勝憑虛春眼醒繞寺煙光分樹碧隔
江山色抱城青花飛細雨雲卿圃草滿斜陽孺子亭時自
太平身自放不煩人識少微星

草草廬

草草廬何處扶疏竹樹間水聲川上閣雨色畫中山盛世
慚無補居停得此間重賡詩老句題壁漏痕斑

吳山寓樓

松林卧一峯簷隙窺千嶂榻冷下方雲寒潮月初上

白水閣

小灘大灘船逆上朝雨暮雨天晴稀正是水窮雲起處亂
山青斷白鷗飛

吳焯字尺鳧號繡谷錢塘人有葑園詩橐

毛大可曰余賦杭州與時賢往來共推吳子尺鳧爲
藝壇之宗嘗講學沈昭嗣園集諸方主客不設司錄
而尺鳧以下坐論格物同異一時學者多稱之願尺
鳧好自秘日居深巷蒔花種竹足不越戶外而車轍
常滿且有千里命駕留幸舍而數晨夕者流連文酒
間嘯歌子汝積所爲詩久而成帙自好尺鳧喜聚書
趙逸稟經酌雅動合古法吳退庵曰尺鳧喜聚書
凡宋雕元槩與舊家善本若飢渴之於飲食求必獲
而後已瓶花齋藏書之名稱於天下所輯薰習錄則
記所藏祕冊也嘗與沈藥城嘉轍陳蔚九芝光符幼
魯曾厲太鴻鶚趙功干昱意林
信七人各賦南宋雜事詩百首

壺山草堂觀先叔父介菴公收藏歷代名畫卷册歌

吳江楓冷朔雁翔兩月兩度來金閫抖擻寒衣氣瑟縮
窗短日留駒光草堂之中多雅設瓊函玉笈紛在旁鵲
奇古燕龍腦斐几拂拭鋪雲肪桓家一廚久緘閉鄴侯
萬鑑隨低昂憶昔盛年大搜索豪取動破千金償眸子炯如

秋月鑿繭絲細拆翠鍼鉞垂老頭華手不倦緘機謬僞恣
品量我幸此游殊不惡一望飽眼還撐腸大卷引丈橫帛
練小幀尺寸齊珪璋交州雪纒越溪紙一一開陳聞古香
江山雲霧起重疊人物草木都輝煌名公大篇著跋尾學
士薤書題左方華原營邱色澤古後苑河陽歲月長顛老
一山天偈側坡公四竹風披猖江南一片真奇逸西蜀萬
本驚擅場元朝四家各面目藝園三品垂芬芳丹邱玉潭
誰輩輩方壺雪谷何堂堂成宏畫院還退舍繪事獨數吳
中強源流分支別南北臺閣定器追晉唐三百年中抉粉
本前有白石後白陽天池潑墨翻海水尙書搖筆凌文昌
羣公衮衮那僕數殘縑沈楮非尋常或經補綴牋素舊間
遺姓氏審諦詳漫說寒具驚點污細認縫印窺收藏僅披

卷册歷千百更有苞裏滿石倉勤搜牢記窮曠旭天風飛
雪催歸裝一往決背漸探頂胡爲縮脚嗟望洋江湖豪翰
元有數幾見什襲千明璫吾兄矜貴手未觸有子修飾重
裝潢收翁作平聲天機之精天帝寶毋使六丁下取將稼軒蘭
長青湖曲壺公鯨游白雲鄉今我一見一太息西望壟樹
煙草黃文采風流不泯沒子孫永保三千霜

寄朱竹垞太史

曾邀夜半撤金蓮蓬閣投簪未暮年誰使山中閱宰相自
知林下卽神仙芸香好護書三萬石凍常消斗十千猶記
城西相送日楊花飛雪斷橋邊

書王昭平先生殉難錄後

請纓一慟淚潺湲空有封章慘聖顏駿馬不鳴風瑟瑟寶

刀欲試土斑斑已拌絕脰酬亡國未放游魂戀故山愁絕
春郊寒食節子規嘸血白楊間

松顛閣

秋風吹客上層臺獨立松顛絕點埃山勢直移高閣去濤
聲橫截大江來冥冥樹色疑將合羃巖巖陰肯放開卻笑
老僧關不住白雲飛出到溪隈

鄒念葦太湖采葦圖

青絲蕭散綠波空鴨背船輕采露叢正值水香春雨後洞
庭山下白蘋風

華岳字秋岳一字德嵩號新羅山人仁和籍臨汀人有

離垢集

張蒲山曰秋岳善人物山水花鳥草蟲皆能脫去時
習力追古法不求妍媚其寫動物尤佳山水未免過

於求脫反有失

處詩亦古質
來名畫家大抵工詩良由天機清妙契
情於筆墨蹊徑之外非專事聲病者可與並論南田
生易代之際瑰意孤衷辭情隱秀未足以畫境限新
羅沈潛畫理直湊單微離垢一集神致脩遠借古體
過於刻意後來惟松壺堪與抗手而七言歌行尤工
己約舉三家庶爲兼美擬諸縱逸一流固靜躁之不同

秋潮

龍君獵秋海甲士三十萬控弦向西發百怪咸走遯當空
曳珠旗颯輪上下飛後軍擊靈鼉白馬無人騎冰雪滿天
來兩岸殷其雷吳雲不得渡越山漸欲摧忽如一匹練并
刀細細裁又如白芙蓉朵朵當花開對此心骨爽登舟駕
蘭槳散髮入中流一嘯千波響江色寒蒼蒼疏林下夕陽
浩歌獨歸去幽夢在龍堂

秋潭吟

川谷險不塞林藪幽可探
夙駕興東郭遙詣西潭坐攬
石壁趣潑面飛生嵐蘿蔓互牽束
離芷相鬢鬢烏佚攀樹
息魚定抱沙潛谿嗽無止水
雲卧有寒巖明游情已憚暮
觀智自酣感此捐猥吝澄抱絕癡貪

夏日作山水題以填空

梧竹陰已深庭架綠亦茂
夏景呈朱鮮累絡韜芳秀將學
雲鳥游直由意外覲筆力盡
屈盤點刷免荒陋山令人攀
登水令人澣漱原坦樹檟粉
壁敲鑿窗竇松膏沃徑肥石
髓抽蘭瘦耳目一時移心智
忽然湊

同徐紫山吳石倉石筍峰看秋色

披雲深竹裏拄杖亂峰頭
怪石一千尺蒼煙四面流
花幢

飄素影木葉響寒秋願借維摩榻談經坐小樓

春日過紫山草堂不值

曉越城西陌湖風吹客顏蒼蒼煙水窟小小雨花關雞犬
寒梅外琴書深竹間徘徊不敢問獨對南屏山

幽居

白雲嶺上伐松杉架起三間傍石巖妨帽矮簷茅不翦鉤
衣苦竹筍常芟廚穿活水供茶竈壁畫鮮風送客帆自有
小天容我樂且攜杯酒對花銜

夏夕

雷火燒青林海風吹欲暮谿雲不得來雨聲隔煙樹

題松月圖贈甯都魏山人

何來一片月清光淨如水蕩入空翠中松風吹不起

曉景

曉月淡長空新嵐浮遠樹數峰青不齊亂插雲深處

辭楓山以扇索畫題此

徑響登山屐一雙客來訪我綠筠窗扇頭索畫吳淞水雨
雨煙煙翦半江

寫秋雲一抹贈陳澹江先生

孤情只愛寫寒秋便有秋聲紙上流更寫白雲三四筆此
中曾與故人游

題憚南田畫冊

筆尖刷卻世間塵能使江山面目新我亦低頭經意匠煙
霞先後不同春

孫琮字執升號寒巢江南華亭人有山曉閣詩

詩話清風涇東達雲間西連魏塘爲江浙分界地宋
白牛居士隱居於此寒巢家有老梧兩樹構一小閣
名曰山曉日坐臥於中藏書數千卷手自鈔閱風雨
寒暑未嘗或輟暇則與一二高僧逸士談禪賦詩蓋
國初江南隱君子也詩如
秋山平遠亦自引人入勝

睡醒

霜寒樹鴉嘯月斜人夢醒梅花紙窗西照見數枝影溪山
跡漸疏朋酒情俱屏清鐘遠林來悠然發深省

送牧大師之嚴州

一雁下平皋羣山秋欲暮渺渺大江寒獨挂片帆去雲浮
峯際塔日落煙中樹羨爾月明時嚴灘深夜住

夜宿韜光山樓

秋雲飛盡秋山出石梯百仞煙嵐溼幾經攀躡到山樓山
僧一見如相識樓前澄泓水一窪水中猶種金蓮花香山

居士題詩處樓閣依然夕照斜佛火微微諸慮冷風枝不
動惟清磬去年春夜宿靈巖夜色幽清同此境韜光泉北
峯巔潺湲落枕疇能眠蒼蒼寒氣三更天夜靜山高人不
到一聲月下聞虎嘯

姜西溟北歸相值吳門卽送其還四明

憶昔南湖杯酒歇秋風秋雨人離別依稀光景二十年嘯
吟夢斷吳山月今春訪舊來虎邱偶到闔門一泊舟城門
貰酒逢姜子執手驚看雪滿頭雪滿頭兮猶未苦聞說朝
趨丞相府可憐燕許廟廊才索米長安望煙火相君罷政
賓客散客亦南歸返鄉縣春風茂苑喜重逢殷勤話舊堪
三歎勸君不如歸故山讀書依舊掩柴關風塵幾許紛華
子轉眼亦復非朱顏嗟我年華過半百詩酒溪山還莫逆

四明山水是君家，憾不相隨挂帆席。

慈航道人金正希先生女辛巳春同姪閩客入黃山
掃蘂菴和尚塔相見雲谷賦此贈之

憶昔南都淪覆日，金公忠烈間世出。崎嶇入閩慨熊公國
脈猶思延萬一天意，亡明勢莫回殘生。皈命維摩詰南渡
文山有故鄉，北征子美無家室。一瓢一鉢返江南，三峯得
法華山律花宮。今日蘂菴師丹陛，前朝司諫秩華山。圓寂
葬黃山，爭光日月金公匹。我游黃山至雲谷，鐵夫留我方
丈宿松間。忽到兩肩輿，一是老尼一儒服。自言金姓閩客
名奉姑，掃塔黃山行。姑受蘂菴親，付囑言之未盡涕泗傾。
太史正希是我祖，隱士靜思是我父。我父垂髫遭亂離，我
祖捐軀報故主。祖有女，今年十九，迸淚深閩攜弟手。驚傳

餘肩破巢搜負弟倉皇竄林藪兢兢形跡恐人知祝髮團
茅苦相守天下承平弟長成歸理家園爲娶婦弟復生兒
喜可知莫謂偷生慚杵白金熊先約成秦晉兵燹存亡斷
音信蘂菴卽是我姑翁往劫沈灰休更訊人生苦海歎茫茫
茫超登彼岸藉慈航慈航道人翁所命了卻三生夢一場
今年我姑七十八參破石頭知路滑父悲早世未酬恩惜
我青衫難振刷聽罷君言心感切君家大義成貞節鬢眉
當日愧元戎忍把忠良看喋血願君保此黃髮期光昭青
史皇天知

夜宿白鶴觀

仙觀知何代長洲古苑東抱琴非舊約清夢許誰同破壁
流春雨殘書溼夜風黃冠饒靜致近日返崆峒

東塔寺同顧司馬晚飯

下馬城東寺銜杯夕照亭參軍鬚尙紫騎省鬢無青廚夜
停齋鼓溪風動塔鈴老僧猶識我此地昔曾經

九月

九月天時好微霜入夜清布衾先得冷草屋不宜城月助
寒溪色泉添落葉聲道人無世味終日掩柴荆

晚泊練塘

野岸初移艇殘陽雁影遙晚山煙裏寺遠水月平橋生計
先謀酒歸心早待潮小園春正好明日是花朝

寄黃九煙

留滯秦淮又幾春亂離作客倍沾巾空餘王粲樓中賦誰
識梁鴻廡下身夜雨滿江銷鐵鏤秋風無淚灑銅人白門

楊柳新亭酒醉裏歸來暗愴神

初秋

豆花棚底嫩涼生閒挈藜牀坐晚晴新漲滿陂羣鳴戲夕
陽在樹亂蟬鳴桑麻無恙家麤給羨芡初嘗酒細傾節屆
星橋纔兩日竹樓已卜夜棋聲

夜泊閩門

閩門夜泊意躊躇城郭猶傳舊闔閭畫舫已過寒食後紅
燈不滅上元初元都幾見花重發皋廡甯無客更居詩酒
欲追唐祝興清狂祇恐未能如

留姜西溟

共坐山窗聽鳥嘯午餐相對祇寒齋十年痛我無親養不
畜茅容舊日雞

杜乘字書載號誰堂江都人有誰堂詩集

新秋

薄雲如曳絮天際送新涼暮雨殘花徑秋星淡草堂漏知
前夜短愁比去年長誰復高樓上秦箏響未央

無計

昨日鳴鳩喚夕陽愁聞朝雨打空廊雲沈野寺山如夢花
落平林水盡香一室輕寒徒袖手滿天離思正迴腸子規
嘯罷歸無計強市村醪入醉鄉

秋旅

村村木葉下斜陽百里雲開見故鄉螢火漸稀隋苑冷麝
蕪不死漢宮荒鮑昭賦後塵封井何遜詩成月滿梁惟有
野鴉驚客意羣呼飛向古雷塘

城上高樓倚暮煙乾坤秋思莽無邊蟹肥蟹社菰蒲水酒
熟孟城橘袖天心事幾年羞狗監人情何處挂龍泉今宵
伏枕窺殘月書寄山妻亦黯然

王午仲夏與項伊泰游吉祥寺後范羅赭山林亭諸
勝

僧房列肆養新花傍水湘簾映日斜白首禪心無著處茶
蘼香裏曬袈裟

北風吹起海雲昏回首江亭挂雨痕拄杖不愁歸路險野
花深處是柴門

羅牧字飯牛甯都人

詩話飯牛工畫山水筆墨蒼渾名重江淮間僑居南
昌宋牧仲高其人作二牧說贈之徐榆溪贈詩云彩
筆常懸夢裏思十年古道見鬚眉雲
山本是無常主更寫雲山賣與誰

題畫

闕罷樓頭策馬歸人家雙掩夕陽扉自知不是忘機者敢
怪沙鷗見卽飛

臨池不解著思爲此幅居然類大癡望去千山秋色好閒
窗風雨慰相思

青峯兩岸畫天然中許沙鷗自在眠愛殺湖光明似鑑欲
支清俸買魚船

劉瞻榕字于根又字南榮號橙林無錫人諸生

詩話于根爲九峯六子之一顧梁汾極稱之梁汾詩
格亦尙幽夏不取甜俗故有特契于根律細而境稍
隘則才分大小不同耳

春日田家

草廬負高阜柴扉面清池村居本自好況有春風吹春風

果何心如與邱園私一夕聲颺濶千頃新綠滋朝來荷鋤
出對此情自怡時運無或愆力田復何疑倉庚先已覺飛
鳴桑樹枝

虎牢

山險形如削河奔勢若翻中原龍戰後巖邑虎牢存游騎
盤飛磴清笳隱壤垣東西任行客天限只空言

送須覲予還晉陵

啄粟野田黃口雀盡日揮之苦難卻翛然老鶴迴出羣連
軒矯翼誰能馴春風樓前梅花白看花君作西洲客細雨
冥冥梅子肥鷓鴣聲裏送將歸何須咎君言別早客舍雖
佳歸更好一帆明日向東去正是鄙夫心憶處

蔣平階字大鴻江南華亭人

詩話大鴻為堪輿大家神解超邁近百年來形家奉為圭臬詩宗唐人才力豐健猶有幾社餘風

禹陵

攏輦逢堯祀垂裳拜舜年剖圭開日月瘞玉鎮山川南幸游方豫東巡駕不還衣冠辭岳牧劍舄步神仙寢廟春常閉宮車夜自懸千秋明德遠萬眾寸心虔海闊滄江外星臨斗柄前金莖留曉露碧殿瑣青煙罔兩猶留鼎蛟龍想負船秦碑荒草合漢時白雲連蒼水書難得元狐籙可傳按圖通百粵淚盡九疑天

送李分虎之滇黔

萬里南中路春風入五溪地分銅柱北山險桂林西樹酒尊堪泛篔船棹自攜關梁莊躡設碑字武鄉題水出滇池倒天臨瘴嶺低鳥言通八部繡面接諸黎聖武初經略征

南振鼓鞞三軍持畢節一戰下和泥荒服開州郡窮邊走
寄鞞闌干紅罽入歌舞白狼齊漢使難重問磨崖不可梯
烏蠻新幕府屬國舊朱提君聽南征曲能令鄉思迷山深
鸚鵡語花老杜鵑呢河外青蛉縣關前白馬氏還將碧雞
賦遲爾到金閨

范纘字武功號笏溪江南華亭人有四香樓詩鈔

陳乾齋曰范子笏溪世傳堪輿家言以其術行江左揚歛間談論詩文肆應不竭精神掩映傾一座無不以去

查灣步吳梅村先生韻

欄石畫多霧戎戎攬石根落花停水斲深竹護沙門鹿過
疑無路雞鳴忽有村徘徊山吐月清梵報黃昏

湖上

閩越干戈息寒鴉還舊林夕陽依草薄霜信入湖深廢苑
何人到空山獨客心不堪頻駐馬歸路接秋陰

京口石松菴曉望大江

巖窗旅枕每晨興殘月餘光樹幾層露鳥乍驚鄰院鼓曉
船猶帶過江鐙天留一水陪行客秋借青山住老僧遙望
海門初日起微微波面白雲蒸

卽事

雨後鴉聲撼寒樹熒熒漁火隨潮去山前煙霧一時昏隔
溪人問停船處

許尚質字又文浙江山陰人諸生有釀川集

詩話釀川集中哭四先生詩蔣寓公大鴻云棲棲黃
冠游要自有深意世人那得知謂效長林志蓋大鶴
少從夏考功陳黃門游晚更不適意游越自稱杜陵
生又文方少數游杜陵生之門從受詩法也集中附

詞五卷毛西河爲之序曰予鄉曩時有創爲西蜀南
唐之音者華亭蔣大鴻也其法宗花間而人之爲草
堂者卻而不進有創爲德祐景炎之音者禾中朱竹
垞也竹垞客子郡覓郡之景炎處士所稱菊山唐汪
蘋洲周密後村仇遠輩而效其倡和相率爲怒急偏
判之詞而人卒局步而不敢前又文接踵而興標新
領尚萃草堂之精而一軌於正有近晚唐者
亦有類德祐景炎者要之皆大晟之聲也

下華頂復至斷橋觀瀑

凌晨陟危磴山勢莽回互攀蘿墜巖石觸趾還跼步側身
煙靄間卻立屢驚顧前行踵已沒循跡如蟻附緣厓忽復
暝孤懸一綫路下瞰老蛟窟白日雷霆怒神物有隱見洪
波無寒沍匿景就盤曲蹒跚生恐怖倏同飛鳥翻云向惡
溪渡巨石恣偃蹇奔流疾相赴褰裳涉逾午晞髮聊延駐
不聞人語聲但覺雨如注遙空垂赤虹中斷不得度知是
古仙人戲游博幽趣俄看萬里雲六月生寒霧倒挂枯松

枝噴薄失朝暮直下幾千仞石竇巧嵌護圓壺東細腰明珠落無數疑有鮫人泣似向真宰訴造幽蕩魂魄發興抒情愴願結丹厓盟庶脫塵網誤

齊河道中

辟塵風鏡隔輕羅贏得征衣嶽色多七十二峯都閱徧又乘疲馬渡齊河

題導山庵壁

四月山中筍蕨肥松寮白晝雨霏霏浮生似記重來處樹老無枝僧挂衣

邊維祺字壽民以字行又字頤公號葦間江南山陽人

詩話頤公喜畫蘆雁爲世所重號曰邊雁高謝文贈詩有云才名到處滿人口兩鬢霜侵只在走費盡香煤百斛餘從教盜作邊鸞手其寫生淡逸意境蕭疏無不入妙但以蘆雁稱之淺矣詩多題畫之作亦多

逸致

題畫雁

三三兩兩傍蘆花風動長江月淨沙多少孤舟未歸客十分秋思在天涯

板橋一曲水通村岸闊沙平絲有痕我畫雁鴻求粉本葦間老屋日開門

老夫家住水雲鄉畫雁撐蘆是所長粵客持將南海去從今邊雁過衡陽

沈湛字淵伯嘉善人諸生有閩游草

詩話淵伯少以文名爲陸清獻所許論詩不喜鍾譚居有五柳遂以名其村

漁梁道中

山勢迂迴梯磴勞漁梁寂寂瀉秋濤儘多斷雁銜蘆出不

住哀猿抱樹號一曲清溪通石澗數稜茅屋露東臯分明
世外桃源路莫遣雲封阻客舸

倪蛻初名羽字振九號蛻翁江南華亭人

詩話蛻翁從甘中丞國璽入滇其後足迹幾徧天下
晚乃定居昆明西門外石礪村築草堂以居有女日
亦夢贊昆明闕氏以外孫爲蛻翁後漢軍張文
和督雲貴爲立石草堂前滇南詩畧附錄其詩

雨發榆城

羅利愚鬼夜努脚血盆之口眼矐矐掀起陰崖萬斛雲不
許蒼山露林薄蒼山有精神瑟縮洱海煙埋難索摸邪龍
肉翅橫空飛天半銀沙雪花落秋風蕭蕭雞脂膊金葉霜
躡會騰攫珊瑚鞭九節捶盲煙直指崑崙破寥廓羅刹對此
不敢侮猙面獠牙顏色阻跚踔空山獨自歸手扶憫懣泣

風雨

蘭州雜詩

振袖上皋蘭煙生闔井寒山深連大漠河急折迴灘人苦
風沙老魂驚行路難隴頭嗚咽水惻惻淚雙彈

晚歸

超忽平原路蕭蕭向晚歸一星霞外出雙雉隴間飛樹亂
村燈暗風恬野燒微鐘聲何處動山靄遠霏霏

馬鳳翥字紹平號恆齋桐城人有復初堂集

詩話桐城馬氏多詩人正誼子六長一公次永公思
公臨公禹公江公而一公名最彰紹平爲禹公嗣子
其兄弟皆以詩鳴紹平七
律典麗輕圓善於儷事

戴賓有意山書屋談次偶成時賓有舉子

意山書屋我曾過無句堪題邵子窩賣賦近聞車轍滿乞
錢常致酒材多檐前綠竹添新筍石上盤根長舊柯莫笑

客爲湯餅至攜尊高唱待如何

題張羲陽道院

道人愛飲靈泉水清曉提壺露溼衣黃葉不離松下火白
雲常護竹間扉廚香齋鉢和鐘動塔響簷鈴識鳥歸何日
丹爐容我伴荷鋤還問藥苗肥

落葉次江觀察韻

摧枯真覺可憐生繞地漫天太愴情紅似林花辭故蒂黃
隨邊草雜寒聲舊承雨露春何蚤盡脫風霜野乍清莫向
江城高處望許多谿壑掃難平

舞幘穿簾亂眼多不堪裁翦奈愁何輕隨野鳥孤雲去響
蹋空林夜月過題怨漢宮翻舊曲含淒越女罷新羅祇因
一雁蕭蕭下引徧城頭烏尾訛

答史陶亭

高樓聞枕大湖邊，湖上青山山下田。
共羨子真居谷口，方知彭澤愛斜川。
扁舟擬擢剡溪雪，蓬閣思登閩苑天。
忽睹新吟如問渡，漁歌樵唱落尊前。

送姚象山之粵西

挾策桐江每借籌，又攜鉛槧向梧州。
元龍意氣甯高卧，司馬文章本壯游。
官舫定期南浦驛，賓筵合醉大雲樓。
欲尋謝傅庭前詠，燕寢凝香好唱酬。

夏日睡翁招過方丈卽事偶成

趺坐繩牀萬慮澄，寒山一片結同心。
詩雖壓藥原無病，竹偶吟風可代琴。
動靜總輪閒處覺，去來休向定中尋。
請看蜀魄離羣久，未必思歸直到今。

馬景字南叔桐城人有聽雨樓詩鈔

詩話南叔天性孝友白頭兄弟朝夕起居惟僅先疇數畝僅供饘粥而吟詠自若晨起必讀書一卷自少至老六十年如一日詩筆情和圓穩在元白之間

送千仞弟之西江

征鞍纔卸自青齊又買扁舟聽曉雞
孺子亭荒秋水白滕王閣峙暮雲低
四山紅樹孤帆遠千里清霜一劍攜
送爾更教懷蜀道鴻飛指爪各東西

馬儻字千仞號髣山桐城人諸生有髣山集

游觀音菴

特爲尋幽蹋布鞵上方高處歷重階
洞空若蚌含澄水峯峭如錐立亂崖
相國金魚隨土落仙人黃鶴著塵埋
燒鉛往事多年冷怪底窮愁未有涯

登黃華山和姚敏仲

城中獨聳高山勝到此方聞鳥雀喧一片綠雲鋪雉堞雙
流白練繞江村亭臨小市初通路屋對深林未有門險阻
聽君談鐵嶺

入汀州路未曾攀陟已消魂

馬庶字少游桐城人諸生有雙岑詩存

詩話少游勇於爲義有烈士風漫詠詩云君子欲兼
善一身匪瀟灑所貴異碌碌豈徒高磊磊可以知其
志

玉屏精舍夜坐

入夏憚炎煥招涼愛幽境僧房夜未闌竹榻卧已冷遂攬
葛衣起獨倚柴關靜亂泉噴雲根清露滴松頂萬籟寂無
聲半規逗微影谿山取奚盡風月懷自騁借問城市忙何
由鐘磬警

秋老

秋老仍爲客江寒此獨行
殘燈浮遠夢細雨度深更
舊事何堪憶新愁又易生
霜華催木葉搖落石頭城